



FOTO RALPH FEINER/52BESTEBAUTEN.CH

La scola cun ina giassa salaschada

(ls/dat) L'anteriura «Scola da dunnas» (oz Scola auta da pedagogia dal Grischun) è vegnida construïda principi dals onns otganta (1981-1983). Ella è damai il davos edifizì pli grond scolastic realisà a Cuira dapi ils onns sessanta. Cuntrari a las autras scolas chantunalas na sa chatta ella betg en il conturn da la citad veglia, mabain sin la spunda vers vest, a l'ur da la citad, en in context oriundamain

rural ed agricul. Ed exact vi da quellas circumstanzas topografias s'orientescha l'edifizì da Robert Obrist (1937–2018). El ha empruvà d'integrar ils divers cubus en il territori spundiv.

La dimora per studentas e students crescha per exempel bunamain or da la plaunca. Percunter metta il tract principal da scola in accent encunter la spunda. Las duas parts sa scuntran giudim enturn ina

pitschna piazza, la quala è accessibla sur ina giassa salaschada – sco sch'i fiss in lieu urban ed autarc.

La «Scola da dunnas» è in dals edifizis che la Lia grischuna per la protecziun da la patria preschenta en il decurs da quest onn per sensibilisar per la ierta da l'architectura contemporana dals onns 1950-2000. Ina survista cumpletta datti sin www.52bestebauten.ch.